

PREZIDENTE REPÚBLIKA DEKRETA ESTADU EMERJÉNSIA DASANULUK-RESIN-IDA

Palásiu Prezidénsial Nicolau Lobato, Díli, 2 marsu 2021

Prezidente Repúblika, Francisco Guterres Lú Olo, iha 1 marsu 2021, dekreta estadu emerjénsia dasanuluk-resin-ida ba lora lora tolu-nulu (30), hahú husi tuku 00.00 iha 4 marsu 2021 (kinta-feira) no ramata iha tuku 23.59 iha 2 abril 2021 (sesta-feira).

Prezidente Repúblika dekreta Estadu Emerjénsia hafoin pedidu estensaun aprova iha Parlamentu Nasionál ho votus-a favor 53 no 12 abstensoins. Molok ne'e, iha 24 febreiru, Prezidente Repúblika rona uluk Konsellu Superior Defeza no Seguransa no Konsellu Estadu molok haruka pedidu autorizasaun ba Parlamentu Nasionál hodi deklarar estensaun estadu emerjénsia ba dasanuluk-resin-ida.

Governu hato'o pedidu estensaun ba estadu emerjénsia ba Señor Prezidente Repúblika tanba haree número kazu registradu ho Covid -19 aumenta iha nível rejionál no nível mundiál. Tuir dadus husi Organizasaun Mundiál Saúde (OMS), iha 17 febreiru 2021, infesaun husi virus Covid nian, SARs-Cov-2 iha mundu rejista kazu konfirmadu hamutuk 109 217 366 no hamate ema hamutuk 2 413 912 . Iha Indonézia, rejista kazu infesaun SARs-CoV-2 hamutuk 1 233 959 no hamate ona 33 596 iha provinsia 34, inkluidu Nusa Tenggara Timur ne'ebé nia kazu konfirmadu aumenta ba 7517.

Dekretu hosi Prezidente Repúblika, hanesan mós sira seluk, hasai parsialmente to'o agora, hodi deklarar estadu emerjénsia, fó kbiit ba Governu bele foti medidas hodi suspende direitu konstitusional balun sidadaun sira-nian, inklui ba sirkulasaun internasional, sirkulasaun iha rai-laran, direitu ba reuniaun no manifestasaun no seluk tan. Kona-ba direitu edukasaun, purezemplu, entidade responsável ba saúde pública bele foti medida suspensaun temporária ba prosesu atividade ensinu ho rejime prezensiál hodi hamenus risku kontájui iha eskola sira.

Medida sira ne'e foti foti nu'udar medidas prevensaun no kombate moras covid-19 atu labele hadaet hosi ema ba ema.

Haree ba número kazu pozitivu ho covid-19 ne'ebé aumenta ba beibeik iha rai viziñu Indonézia, no tanba detekta kazu pozitivu iha aldeia Clau-Halec, suku Bee Lulik Leten, husi sidadaun sira ne'ebé halo pasajen ilegál husi fronteira-rai, Governu dekreta serka sanitária iha 15 febreiru 2021 ba munisípiu Covalima no Bobonaro.

Liuhosi Dekretu Prezidénsial ba estadu emerjénsia ba dasanuluk-resin-ida, Prezidente Repúblika husu atu Forsas Armadas bele haforsa Polísia Nasionál Timor-Leste no Departamentu Governamentál ne'ebé responsável ba saúde pública hodi hala'o atividade sira ne'ebé presiza ba fiskalizaun no ezekusaun estadu emerjénsia hahú hosi 4 marsu.

Bazeia ba Dekretu Prezidente Repúblika, publika horseik iha Jornal Repúblika no hahú bainrua, 4 marsu, zero oras, Governu mak sei define medidas implementasaun estadu emerjénsia ba dasanuluk-resin-ida nian.

Renovasaun ba estadu emerjénsia halo nafatin tanba ita sei hasoru nafatin kalamidade públika.

Husi fulan marsu 2020, bainhira rejista kazu pozitivu ida ho covid-19, Timor-Leste implementa kedas estadu emerjénsia. Implementasaun estadu emerjénsia ho medida oioin, hanesan medida preventiva no kontrolu covid-19 labele daet ba populasaun mak permite ita seidauk iha transmisaun komunitária.

Sidadaun sira ne'ebé hakaat fronteira liuhosi dalan ilegál lori tama mai Covid -19 no tanba hetan kazu pozitivu ho transmisaun lokal iha aldeia iha Fatumea no Tilomar, Covalima, Governu hasai rezolusaun hodi implementa serka sanitária ba munisípiu rua iha fronteira, Covalima no Bobonaro.

Ministériu Saúde halao teste massal iha munisípiu Bobobaro no Cova Lima hodi buka hatene grau ka nível transmisaun lokal ba moras coronavirus iha zonas fronteirisas.

Ohinloron Timor-Leste rejista kazu pozitivu na'in-23. Husi marsu 2020 to'o ohinloron, iha ema na'in-113 hetan infesaun husi SARs-CoV-2, sira seluk rekuperadu no seidauk rejista ema mate.

Ohin Konsellu Ministrus deside mantein serka sanitária ba de'it munisípiu Covalima. Serka Sanitária signifika katak comunidade Covalima labele tama-sai ho liberdade hanesan horiuluk.

Ba munisípiu sira seluk no RAEOA, sei la iha lockdown. Ita presiza tuir nafatin medida prevensaun: uza máskara, fase liman ho sabaun no halo distansiamentu sosiál.

MÍDIA PR